

Allannguutissatut siunnersuut

uunga

Uunga siunnersuut: Raajanut akitsuutit pillugit Inatsisartut inatsisaata allanngortinneqarneranik Inatsisartut inatsisaat nr. xx, xx 2011-meersoq

Naalakkersuisut aappassaaneerinissami saqqummiussaat.

§ 1-imut

1. § 4 a peerneqarpoq.
2. § 2, imm. 1 ima oqaasertaqarpoq:
”Imm. 1. Raajat § 1-imi taaneqartut akiinit akitsuummut akiliisoqartassaaq, takuulli § 3. Nunanut allanut nioqquteqartup Kalaallit Nunaanniit Kalaallit Nunaata avataani apuuffissaannut assartuinermi aningaasartuutit ilanngutinngippagit, tunisinermi aki raajanut akitsuusigassanut kiilumut 1 kr.-imik qaffanneqassaaq.”
3. § 4, imm. 2-mi ”kiilumut akiat” kingornagut ivertinneqassaaq: ”, § 2, imm. 1, oqaaseqatigiit aappaat naapertorlugu qaffaataajunnartunik ilasaq”

Siunnersuummut oqaaseqaatit

Oqaaseqaatit nalinginnaasut

Naalakkersuisut inatsisissatut siunnersuutip siullermeerneqarnera ilutigalugu maluginiarpaat, maleruagassiatut siunnersuutaaqqaartup assartuineri aningaasartuutit ilanngullugit ilanngunagilluunniit tunisinermi akitsuutinik akiliinissamik kalluaannginnissaq qulakkiivinngikkaa.

Akitsuutip assartuineri aningaasartuutit ilanngullugit ilanngunagilluunniit naatsorsorneqarinnissaa eqqarsaatigalugu siunnersuutip sapinngisamik kalluaannginnissaa Naalakkersuisut siunniussaraat.

Aammattaaq Naalakkersuisut paasivaat aalajangersakkap siunnersuutaasup siulliup qanoq pisoqarnera apeqqaatillugu Landskarsimut isertitassatigut annaasaqaataalaarsinnaasoq. Iser-titassatigut annaasaqartoqarsinnaavoq nunanut allanut nioqquteqartut tamarmik assartuineri aningaasartuutit tunisinermi akigititaminnut ilannguttarunnaassappatigut.

Taamaammatt Naalakkersuisut aalajangerput allannguutissatut siunnersuummik saqqummius-siniarlutik, nunanut allanut nioqquteqartut tunisinerminnut atatillugu assartuineri aningaa-sartuutinik ilanngussisanngitsut, raajat tunineqarneranni akiannik raajanut akitsuusigassanut kiilumut 1 kr.-imik qaffaasalersillugit.

Nunanut allanut nioqquteqartut tamarmik assartuineri aningaasartuutit tunisinermi akigitita-minnut ilannguttarunnaassappatigut isertitassatigut annaasaqaratarsinnaaneq siunnersuutikkut pinngitsoortinniarnearpoq. Tassa nunanut allanut nioqquteqartut akitsuutinik akiliisinneqar-tarnerinik kalluaannginnissaq allannguutissatut siunnersuutip siunnersuutaaqqaartumit qulak-keernerussavaa.

Naalakkersuisut qaffaassutissamik angissusiliinerminni assartuineri akinut massakkut atuut-tunut sapinngisamik qanillattorniarpot. Tassunga ilanngullugu eqqarsaatigineqarpoq akit mas-sakkut atuuttut allanngortinneqarneri tamaasa inatsisinik allannguisarnissap ajornakusoortuu-nissaa.

Allannguutissatut siunnersuutip kingunerisaanik isertitassat ukiumut 1,5 mio. kr.-inut missili-uunneqarput.

Aalajangersakkanut ataasiakkaanut oqaaseqaatit

Nr. 1-imut

Naatsorsueriaatsimik nunanut allanut nioqquteqartut, qanoq niueriaaseqarnerat apeqqutaatinagu akitsuutinik akiliisinneqartarnerannik kalluaannginnissamik, siusinnerusukkut siunnersuutaqqaartumit qulakkeerinninnerusumik siunnersuuteqarnissamik aalajangerneq siunnersuummut tunngaviuvoq, tak. ataani 2 aamma 3.

Nr. 2-mut

Siunnersuutaavoq nunanut allanut nioqquteqartut Kalaallit Nunaanniit tunisiffigisaminnut Kalaallit Nunaata avataaniittumut assartuinermi aningaasartuutinik ilanngussisannigitsut, raajat tunineqarneranni akiat raajanut akitsuusigassanut kiilumut 1 kr.-imik qaffattassagaat.

Assersuutigalugu raajat akitsuusigassat tunineqarnerini, assartuinermi aningaasartuutit ilanngunnagit kiilumut 14 kr.-qarpata, taava akitsuusiinissamut tunngavissamik naatsorsuinermi tunisinermi akigititaq 15 kr.-inut qaffanneqassaaq.

Nr. 3-mut

Siunnersuut nr. 2-mi taaneqartumi allannguinermik tunngaveqarpoq, taamaasilluni nunanut allanut nioqquteqartut Kalaallit Nunaanniit Kalaallit Nunaata avataani apuuffissaannut assartuinermi aningaasartuutit ilanngutinngippatigit, tunisinermi aki raajanut akitsuusigassanut kiilumut 1 kr.-imik qaffaassasut.

Akigititat nikerarneri aallaavigalugit raajanut akitsuusigassanut naatsorsueriaaseq atorneqartoq allannguinerup kingunerisaanik allanngortinneqanngilaq.